



**Trump-i Greenland meshir,
Spain den shishilempa masütsü**

**Sourav Ganguly ICC Hall of
Fame nung züngoktsü**

VOL. XXIII ISSUE NO. 266 (ADOK 266) DIMAPUR YANGTEPNÜ (THURSDAY) CHITENI (JULY) 09, 2026

₹ 5.00

July 9 nungi 12 tashi tsüingsang majungtsü

Dimapur, July 9, 2026 (TYO): July 9 nungi 12, 2026 tashi Nagaland kübok district aika nung tsüingmok aser tsüingi dena tzünglu arutsü ta Nagaland State Disaster Management Authority (NSDMA), Home Department-i metetdaksüogo.

July 9, 2026 nü Kohima, Shamator, Mokokchung, Mon aser Wokha district tem nung tsüingmok aser tsüingi dena tzünglu arutsü. Maneni, Longleng, Noklak, Phek, Tseminyu aser Tuensang district tem nunga tzünglu terara arutsü.

July 10, 2026 nü Shamator aser Tuensang nung tzünglu arutsü, Mon district nunga tzünglu terara arutsü aser Kohima, Longleng, Noklak, Tseminyu o Zunheboto district tem nung jokshia arutsü ta NSDMA-isa metetdaksüogo.

July 11, 2026 nü Peren, Phek,

Tseminyu, Wokha, Dimapur aser Niuland district tem nung tsüingmok aser tsüingi dena tzünglu arutsü. Kasa anogo nung Kohima, Longleng, Mon aser Tuensang district tem nunga tesem kar tzünglu terara arutsü akok.

July 12, 2026 nü district teimba ka nung tsüingsang majungtsü. Kohima, Longleng, Meluri, Mokokchung, Mon, Phek, Shamator, Wokha aser Zunheboto district tem nung tsüingmok aser tsüingi dena tzünglu arutsü. Kiphire aser Tseminyu district tem nung tzünglu tashii arutsü aser Dimapur o Tuensang nung terara arutsü ta parnokisa metetdaksü.

Nübertemi NSDMA Weather website aser SAFER Nagaland App ajanga tsüingsang-mopung indang osangtsüsang metetepelaa alitsü metetdaksür ta NSDMA-isa ashi.

Kuki-Zo Christian Forum-i Manipur CM dang mepishir

Imphal, July 8, 2026 (Agencies): Kuki-Zo Christian Forum (KCF)-i Manipur Chief Minister Yumnam Khemchand Singh nem memorandum ka agütsüogo.

KCF-i Manipur CM dang Kuki-Zo nung 14 atema temeten meshir, Kuki-Zo tesemtem nung economic blockade agentsü aser official o media nung parnok tebilemtsü timi lemsateptsü metetdaksüogo.

Chief Minister Khemchand-i Kangpokpi semdangdang Kuki-Zo Christian Forum lennirtem den ajurutepa sensaksema liasü aser idangji pa nem memorandum agütsü. Iba mapang CM Khemchand-isa public sentong ka nung aden aser yimjung o putepshitsü

indang jembia liasü.

Kuki-Zo nung 14 pastor asem aser arogo lennir pezü densema tatalokba balala nung nisung 14 tepsetogo. May 13, 2026 nü arogo lennirtem amenba gari ana amakdang Kuki-Zo Christian Forum nung taoba chairman ka densema arogo lennirtem tepset ta KCF-i CM dang ashi.

Manipur nung May 3, 2023 nung kin o kin tsüingda mangatettep adokba arudang tenla ki 350 tema raksatsüogo aser Kuki-Zo pastor tem aser arogo lennirtemi teti yimjung aser aremzükteptsü atema mepishia arur ta parnokisa ashi.

Parnokisa sorkar dang Kuki-Zo nung takümtem aser alemli nungi liyonga aruba ali kümzüka ayutsü mepishio.

SVAN aser SEWA rongdak senden amen

Dimapur, July 7, 2026 (TYO): Nagaland nung ketdangpurtem, kijatem aser telok balalai street vendors dang tashiyim agi sen meshiba, timtem agütsüba aser tashiyim agi meindokba ken o tem atema Street Vendors Association Nagaland (SVAN) aser Self-Employed Women's Association Nagaland (SEWA Nagaland) tsüingda rongdak senden ka menogo.

July 7, 2026 nü Hotel Grand Tizu, Dimapur nung senden amendang parnok Street Vendors Act 2019 Central aser 2019 nung Nagaland nung Rules and Schemes lateta aliba nung ajemdaker ozüing amertem den

amalitepa parnok temeten kümzüka ayutsü bangjemtepo.

Street Vendors Association Nagaland nungi President Kughato Zhimo aser General Secretary Dr. Subonglemba Aier nati anir ketdangpurtem aser Self-Employed Women's Association Nagaland President Mrs. Atoli-i anir teshimtet nübotem iba senden nung aden.

Senden nung adenertemisa street vendors, talisa tetsürtem tashi itdaksütsü indang jembia aser iba ya local authorities aser district shia nung Town Vending Committee den amalitepa inyaksü lemtetogo.

Kidanger state temi Assam li 82,751 hectares atsünga agia lir

Guwahati, July 8, 2026 (Agencies): Assam li hectares 83,000 shi ka kidanger state pezü- Arunachal Pradesh, Nagaland, Meghalaya aser Mizoram ket nung lir ta State Assembly nung metetdaksüogo.

Assam Assembly nung Congress MLA Rekibuddin Ahmed-i asüngdangba ka langzüdang Border Protection and Development Minister Atul Bora-i iba osang lemsatep.

Assam kübok district 18 nung ali 82,751.86 hectares tashi inter-state boundary mangatettep adoka lir ta Minister Bora-i ashi.

Nagaland-i ali 59490.21 hectares atsünga agiogo,

Arunachal Pradesh-i 16144.0117 hectares, Mizoram-i 3675.78 hectares aser Meghalaya-i 3441.8601 hectares atsünga lir ta Bora-i metetdaksü.

District 18 ya Sonitpur, Biswanath, Lakhimpur, Dhemaji, Tinsukia, Dibrugarh, Charaideo, Jorhat, Sivasagar, Golaghat, Goalpara, Cachar, Kamrup, Kamrup Metropolitan, South Salmara-Mankachar, West Karbi Anglong, Hailakandi aser Sribhumi lir ta paisa ashi.

Assam sorkari kidanger state tem den olemtep ajanga mapang talangka mebenteti aruba arrtsü ken o tem angatetteptsü meranga arur. Union Home Ministry-i tetuyuba agütsüba sülen Meghalaya aser Arunachal

Pradesh denbo bilateral agreements sign sütepogo ta Minister Bora-isa metetdaksü.

"Kodang state tasentem aküm idangji arrtsü junga lateta mayu, iba jagi Assam-Arunachal Pradesh, Assam-Nagaland, Assam-Mizoram aser Assam-Meghalaya arrtsütrem asoshi mangatettep ken o tem adok" ta pai ashi.

"Onoki item ken o tem teti atema angatetteptsü meranger. Meghalaya, Arunachal Pradesh aser Mizoram-i lenji aruogo, Nagaland den maneni olemtepdar saka Supreme Court tsüingda ken o ka benoka lir. Taruba küm pungu tsüingda item ken o tem bentettsü imlar" ta Minister Bora-isa shisem.

Fazl Ali College nung teaching aids aser IT equipment amenokogo



NLA Speaker Wb. Sharingain Longkumer (tiyong) den BPCL Manager (Sales) Abishek Paul Mkg. DC Ajit Kumar Verma FAC Principal Dr. I. Wati Imchen, aser Mkg. SP Vesopra Kezo parnok Fazl Ali College Mokokchung nung tanü teaching aids aser IT equipment anasa tangokba noksa.

Mokokchung, Chiteni/July 08 (TYO) : Fazl Ali College Mokokchung nung tanü Corporate Social Responsibility (CSR) sentong kübok Mokokchung District Administration- ketdangsüba nung Bharat Petroleum Corporation Limited (BPCL)-i achaayanga teaching aids aser IT equipment -tem amshi tenzüksü asoshi Nagaland Legislative Assembly Speaker Wb. Sharingain Longkumer-i lapoktsüogo.

Fazl Ali College nung modern educational technology amshia sayutsü asoshi All-in-one PCs-15, interactive smart panels-10, Public Address (PA) lectern systems-10, UPS units with batteries-10 amenokogo.

Tanü sentong NLA Speaker Wb. Sharingain Longkumer-i jembidang India sorkari sentong tajung atonga Corporate Social Responsibility (CSR) ajanga

India lima nung society, education, healthcare mapa tajung jenti inyaka temelenshi arudagi aser iba mapatong nung Bharat Petroleum Corporation Limited (BPCL) ajanga educational institutions-tem nung tanü mapa mapa tajung inyakba ya kuli tajung lir ta ashi.

Viksit Bharat 2047 sentong kübok India lima nung temelenshi balaka adoka alitsü sentong inyaka aoba mapang ka Nagaland state iba mapatong nung temelung agüja inyaka aliba mapang ka nung Fazl Ali College nung kanga dang nungdaka aliba item osettsüset amenokba ajanga tarutsü putu asoshi teimla akaba nüburtem nem tajangzüka agütsüba mapa lir ta NLA Speaker-isa metetdaksü.

Sharingain Longkumer-isa tang tensa nung lanurtem zünger mapa mongui nemzütepba tensa ka nung Fazl Ali College nung

item osettsüsettem amshia sayuba ajanga ajanga tangazüba tasen nung pei taküm nung temelenshi kadaktsütettsüsa züngtettsü aser tagidak aliba nisung kümteettsüsa iba maongka tajung agiangta sentong nung adenshia aliba kaketshirtem ajungshia jembia.

Sentong nungsa Mokokchung Deputy Commissioner Ajit Kumar Verma, Fazl Ali College Principal Dr. I. Wati Imchen, Abishek Paul, Manager (Sales), Nagaland and Manipur, Bharat Petroleum Corporation Limited (BPCL) parnokia shilem agia jembiba den Dr. E. Benrithung Patton, Associate Professor, Department of Political Science ketdangsüba nung iba sentong agi aser tatem nung Chuchuyimpang Baptist Arogo Asso. Pastor(W) Benjongsenla ajanga tenüingsang agüja sarasadema sentong tembanga liasü.



Dr. Imkongliba Memorial District Hospital (IMDH) Mokokchung pur atema agütsüba Advance Life Support (ALS) Ambulance ka Nagaland Legislative Assembly (NLA) Speaker, Sharingain Longkumer-i lapoktsüba mapang tangokba noksa nung angur. Iba ambulance ya PowerGrid Corporation of India Limited (POWERGRID) company-i parnok indang CRS ajanga inyakba maparen ka lir. Iba sentong nung Mokokchung DC, Ajit Kumar Verma IAS, PGCIL Chief Manager Thapana, Ao Senden Tir Marsanen Imsong, IMDH MS Dr. Alemwabang Aier, Dr. Kilangwabang Pongener aser Dr. H.T Sangtam parnokia shilem agia jembi. Mokokchung Town Baptist Arogo (MTBA) Pastor, Rev. P. Chuba Jamir-i iba ambulance meshitetsü. (Mokokchung, 8th July, 2026)

Wokha nung terenlok aser tayongzükba asadanga DISHA senden amen

Dimapur, Chiteni/July 08 (TYO): Member of Parliament (Lok Sabha) aser DISHA Chairperson, Supongmeren Jamir mendenpuba aser Deputy Commissioner Wokha, K. Mhathung Tsanglao teyariba sür July 7, 2026 nü Deputy Commissioner, Wokha indang Conference Hall nung District Development Coordination and Monitoring Committee (DISHA) senden mena liasü.

District nung department balalai sentong, scheme aser inyakyim balala inyakba aser itemji ajanga nüburtem ajangzükba tejangja asadangsü aser terenlok maparen nung tetsükdaksü ajuruba bentetsü asoshi iba senden ya amen.

Supongmeren Jamir-i DISHA senden amenba nükjidong lemsatep aser district nung terenlok alitsü atema ibai tongtipang lir ta ashi.

Iba senden nung Agriculture, Labour aser Veterinary department temi parnok nükjidong, schemes, programmes, aser tayongzükbatem amshia PowerPoint presentations agüja liasü.

District Agriculture Officer, Renathung Kikon-i National Mission on Natural Farming and also NMEO?Oil Palm amala scheme tem indang rasaa ashi aser iba scheme kübok Wokha district nung yimsüng 14 nung ali hectares 243 awajemer ta

ashi.

Pai Kohima, Chümoukedma aser Niuland district tem nungi meta talang asüba yong Ralan Block nung field officers temi timtem ajangshiba densema tayongzükba balala lemsatep aser sub-division balaka nüngdaker ta ashi.

Assistant Labour Commissioner Wokha, Neimenuo-i Nagaland Building and Other Construction Workers' Welfare Board (NBOCWWB) indang osang agütsüdag, registration ajak agi 1,788 lir aser iba nungi active 763 aser inactive 988 lir, 2025-2026 mapang tasüba ti, scholarship nisung 630 nem agütsüogo, maternity teyari nisung pongu nem agütsü, medical teyari nisung ana ne maser nisung 768 nem hadir agütsüogo ta ashi.

Laisa Employees' State Insurance Corporation (ESIC) Scheme aser Employee Provident Fund Organization indang süoka jembidang, aluyimba maparen balala ajanga mayimjemtetba aser beneficiaries den osang agiteptsü asakba indang lemsatepa liasü.

Chief Veterinary Officer Wokha, K. N. Zubemo Humtsoe-i Animal Husbandry and Veterinary Department indang presentation agütsüba mapang, district nung küm ka

nung shi 3,614 metric tonne achir aser production ya 1,964 metric tonne lir, anungji 1,649.55 MT agi meperir, koba sen 36.64 crore shi indang lir ta metetdaksü.

Pai March 2026 nü tenzüka May 2026 nungi mapa kuma inyakba National Livestock Mission kübok Livestock Insurance Scheme indanga jembidang, department-i premium shilem 85 awajemogo aser beneficiaries temi shilem 15 awajemogo ta asho. Paisa NLM kübok Entrepreneurship Development Programme indanga rateta shia liasü.

Humtsoe-i KVK, ICAR Wokha den lungjemer October 2024 nung Artificial Insemination Technology sentong tenzüka indang lemsatepdang, iba sentong indang nükjidong ya ak metsü tajung adokdaksütsü aser tashidak prokshia aoba nungi jenbutsu asoshi lir, ta ashi.

Tawa Wokha Town, Wokha village, Pangti, Baghty aser Chukitong nung African Swine Fever poktetba indang osang lemsatep aser iba tashidak ajanga ak 374 dak tema asü aser sen 1.04 crore shi akoksaogo ta ashi.

MP Supongmeren Jamir-i sensaksemba nung shilem agia scheme indang component balala indang reprangshia asüngdangya liasü.

Chümoukedima DPDB senden July 10 nü amentsü

Dimapur, Chiteni/July 08 (TYO): Ita shia amenba Chümoukedima District Planning & Development Board (DPDB) senden July ita atema July 10, 2026 anepdang 10:30 ako nungi tenzüka Deputy Commissioner, Chümoukedima

indang Conference Hall nung amentsü, ta Deputy Commissioner, Chümoukedima, Polan John, NCS-i sangdong ka nung metetdaksü. Iba senden nung züngsem ajak arua adentsü paisa nenshia ashi.

DC Chümoukedima-i NH-329A Right of Way atema metetdaksür

Dimapur, Chiteni/July 08 (TYO): Office of the Deputy Commissioner, Chümoukedima ajanga sangdong ka agütsüba nung NH-329A (Pimla Junction-Mhainamtsi stretch) indang Right of Way (RoW) küboki aitba ali kiburtem dang 'claims and objections' meshia liasü.

Iba sangdong ya Gauhati High Court, Kohima Bench ajanga totuyuba agütsüba ama inyaker alitsü. Court-i Deputy Commissioner dang iba highway indang Right of Way nung aitba ali kiburtem jangjatepa mangatettep aliba mesüra temeshitsü jangjateptsü, ali kiburtem nungi 'undertakings' meshitsü aser item inyakba osang Court nem agütsütsü totuyuba agüja lir.

Anungji Chümoukedima district kübok Pimla Junction

nungi Mhainamtsi tashi NH-329A alignment nung aliba ali kiburtem dang parnok taginüba mesüra tai apuba lira iba sangdong adoker anogo 30 tsüngta Office of the Deputy Commissioner nem agütsütsüla, ta ashi.

Kibur temi pei tenüng, address aser contact tejangja, ali indang tejangja aser tesem, taginüba yimya, item yariba documents, aser tarutsü nung Right of Way küboki aitba tesem nung taginüba lira, itemji tejangja zülur agütsütsüla.

District administration-i ali kibur ajak dang mapang shidak nung documents agütsütsü ajungshir. Iba dak tali osang tejangjaba metetner temi office mapang Office of the Deputy Commissioner, Chümoukedima den tongteprateptsü akok, ta sangdong ajanga ashi.

ULLAS programme kübok FLNAT results sangdongogo

Dimapur, Chiteni/July 08 (TYO): Directorate of School Education, Nagaland-i State Literacy Mission Authority (SLMA) ajanga ULLAS (Understanding Lifelong Learning for All in Society) programme kübok agiba Foundational Literacy and Numeracy Assessment Test (FLNAT) indang results sangdongogo.

Iba assessment ya March 21, 2026 nü Phek, Tuensang, Mon, Zunheboto, Peren, Dimapur aser Kiphire district tem nung iba programme kübok enrolled süa aliba adult learners indang foundational literacy aser numeracy skills tem asadangsü asoshi agia liasü.

Iba assessment atema learners 5,069 - tebur 1,468 aser tetsür 3,601 - agüja liasü aser

nisung 4,522 (tebur 1,314 aser tetsür 3,208) takok ngua liasü.

National level nung evaluation aser result finalization mapa tembanga State nem final results yokba sülen iba result ya sangdong.

Nagaland nung ULLAS mapa kuma inyakba nung ibai tongtipang alizüing ka lir aser ibai adult learners, Volunteer Teachers, District Education Officers, Block Resource Persons aser iba sentong dak sendaka aliba stakeholders temi lungjemer meranga inyakba ajanga lir ta Directorate-i ashi.

Directorate-i takok angur ajak nem tenüngsang agütsü aser District Education Officers, Volunteer Teachers, field functionaries aser nüburtem dang pelaba lemsatepa liasü.

Fazl Ali College nung Orientation sentong ayongzük



Dimapur, Chiteni/July 08 (TYO): Fazl Ali College, Mokokchung nung July 8, 2026 nü BA/B.Com/B.Sc indang First Semester kaketshir asoshi Orientation sentong ka college auditorium nung ayongzüka liasü.

College nung kaketshir tasentem nung academic aser college yimya tajungba nung angatetdaksütsü nükjidong nung iba sentong ya ayongzüka liasü.

Sentong nung College indang Vice Principle, L.S. Vinod-i pela agizükba o jembia

kaketshirtem nem tenüngsang agütsü aser FYUGP kübok academic course indang tongmelang agi rasaa ashi.

Küm shia jenjang tajung nung takok anguba kaketshir dang admission fee shilem 50 ajemer agir aser taküm kaketshir ter shimtet, Arts nungi pongu, Science nungi asem aser Commerce stream nungi ana lir, ta pai ashi. Paisa iba sentong nung item kaketshir nem sen ya meyipa agüja liasü.

Maongienla, Asst. Professor, Dept. of English ajanga College indang tongmelang agi

lemsatepba mapang ki o jen, streams balala atema facilities agütsüba, extra-curricular activities, College-i services aser teyari agütsüba aser kaketshir yimya indang shia liasü.

Iba sentong nung Sashikokla Jamir, Asst. Professor, Dept. of Geography menden liasü aser Nunghitemjen Longkumer, Asst. Professor, Dept. of Sociology ajanga kaketshir atema sarasademsü.

Iba sentong nung kaketshir, tsürabor, kinunger aser tesayurtem dena liasü.

NH-29 nung nüburtem kumdanga senzütsü ayongzüker

Dimapur, Chiteni/July 08 (TYO): Meyi tzunglu aruba mapang tenzüka aser long tsüksü aser alinen alutsüsa tensa akumba ajanga Deputy Commissioner, Chümoukedima, Polan John, NCS-i nüburtem dang Chathe Bridge (Unity Gate) nungi Tsiedukhru-Khuokhi Bridge, Kukidolong tashi NH-29 nung saksalema senzütsü tekumdangtsü metetdaksüogo.

Sangdong nung iba lenmang amshir ajunga dang talisa tzunglu kanga sashia aruba mapang aser amhang nung iba tesem nung kanga saksalema aser kumdanga senzütsü ayongzük, kechiaser alinen aluba aser long mezüzüka aluba iba mapang timba ataloker.

Traffic diversions shidak

anidaksüla aser iba tesem nung aliba ketdangsür temi totuyuba agütsüba sülen shidak anidaksüla. Iba four-lane highway nung left-hand side (LHS) carriageway ya nüngdakba mapang jelia osang magütsüi mapang tatsütsü asoshi shibanga ayutsü akok, ta sangdong ajanga ashi.

Iba lenmang tensa mesüra tatalokba dak sendakba nung tejangja masüba osangtem meporokshitsüla mesüra mamangtsüla, aser tim ketdangsüri osang agütsüba nung anidaksüla, ta ashi.

Deputy Commissioner-i iba lenmang amshir aser senzür ajunga dang administration den amalitep akatsü aser safety measures shidak agitsü ayongzük.

Jabali Development Corporation Limited (JDCL) ONOK DEN DIMAPUR, CHÜMOUKEDIMA & NIULAND NUNG INYAKTSÜ AREA COORDINATORS BUSHIR

Asen kin nungi nübo tajung, tetsür süli, tebur süli, shibai nübor ajurua JDCL indang tangatetba agüja iba company nung Shareholders akümtsü lenmang sayua tesendaktep tajung yanglutettsü, iba ama nüboji JDCL nung Coordinators asütsü bushir.

Coordinator ka teinyaktsü :

- Nai alidak asen nübor bushia tesentaktep yanglutsü.
- JDCL nung share alitsüba maongka indang ashitsü.
- JDCL nung share alitsüba inyakyim nung yaritsü
- Nübertem den ochishia JDCL tenüng nung shilem agitsü.

Onoki bushiba nisungji :

- Class 12 bo ajanteta azüngba nisung (tazüngba degree kangabo menügdaker)
- Tamalen Sales aser Marketing amala nung inyakdanga alir nem maongka agütsütsü.
- Pei nübertem den jembitetba aser tangari temulung lemteta aliba nisung
- Peisasa inyaktsü mulungtetba, ochishir aser nisungtem ajurua marendaki jembitetba temulung tesadok nisung

JDCL nung kechiba adener

- Asen kini aniba terenlok mapa nung shilem agir ka akümer
- Pei mapa yari taa aser teyari tajung agütsür.
- Pei mulungba nung pei alidak inyaktsü akoker.

Koma Apply asü ?

Yangi agüja aliba JDCL website nungi 'JDCL Coordinator Application Form' agizüker kasa website nungjisa agüjangma.

Contact : +91 9863566932 | Email : support@jdcl.co.in | Web www.jdcl.co.in



July 08, 2026 nü Yogyakarta, Indonesia nung Ato kilonser, Narendra Modi aser Indonesia Tir, Prabowo Subianto nati Prambanan Temple Restoration Project tenzüksüba sülen tangokba noksa nung angur.

PM-JAY kübok insurance sen lakh 5 aliba nungi 10 akümtsü benoker

New Delhi, Chiteni/July 08

(Agencies): Parliamentary Standing Committee on Health & Family Welfare-i Ayushman Bharat-Pradhan Mantri Jan Arogya Yojana (PM-JAY) scheme kübok health insurance sen lakh 5 aliba nungi sen lakh 10 kümjang, ta benokogo.

Committee-i, tang lezmükja aliba sen lakh 5 yagi temesen transplant, temelungjang surgery aser immunotherapy densema taküm kümzüksüsa treatment agitsü mepirir, ta ashi.

Parliamentary committee-isa, medical treatment kanga tejakleni aoba ajanga treatment agidang indokba sen aika adoker, aser ibaji ajanga aikati pei ket nungia sen aika indoktsüsa akümer, ta metetdaksü.

"Tang iba scheme kübok sen lakh 5 ya ajanga meperir, kechiyong temesen transplant

densema temang shilem balala transplant asüba, temelungjang surgery agiba aser immunotherapy treatments atemabo senotsü asemsü dak tali adoker," ta Parliamentary committee report nung shia lir.

Committee-i iba scheme kübok tang sen lakh 5 tashi aliba nungi lakh 10 kümtsüsüla aser PM-JAY kübok special high-cost packages agütsüsüla, ta metetdaksü.

PM-JAY ya sorkari tenzüka health insurance scheme ka lir, aser iba scheme kübok kibong shia nem küm nung sen lakh 5 jenjang cashless health cover agütsür.

Iba scheme ya states aser Union Territories 35 nung benoka lir.

Iba scheme tenzüka sülen taküm January 31 anogo tashi nung iba scheme kübok Ayushman Cards crore 43 dak tali agütsüogo.

Congress-i Champat Rai tangsa aputsü akhanger

New Delhi, July 08

(Agencies): Congress party-i, Shri Ram Janmabhoomi Teerth Kshetra Trust nung taoba general secretary, Champat Rai tangsa aputsüla aser Ram tekülem ki tenla auyaba onük nung Ato kilonser, Narendra Modi-i jembitsüla, ta metetdaksü.

Champat Rai aser Trust züngsem Anil Mishra nati menden nungi anenba shidi agütsüba sülen July 6, 2026 nü Trust-i shidi anapronglaji agizükogo aser Trust züngsem Krishna Mohan interim general secretary shimogo.

Congress general secretary, Jairam Ramesh-i X ajanga, "Congress-i item ya akhanger: Iba Trust ya tngsa anentsüla; aibelenertem aputsüla; Supreme Court-i ketdangsüa bushisüngdangtsüla; Trust tasen ka tentettsüla; linük dang tatok meshitsüla. Modi, nai ola adoktsüla," ta metetdaksü.

Osangbenertem senden ka nung jembidang Congress lenir

Shaktisinh Gohil-i, "Tang aliba Trust ya anentsüla aser Shankaracharyas, retired Supreme Court judge, Nirmohi Akhara züngsemtem aser Seers züngsemtemi Trust tasen tentettsüla," ta ashi.

Taoba mapang MP, Gohil-isa, Ayodhya nung Ram tekülem ki nungi auyaba sen crore 16-18 aliba nungi lakh 24-26 kümogo, ta metetdaksü.

Samajwadi Party lenir, Tej Narayan 'Pawan' Pandey-i tamalen, Ram tekülem ki nungi auyaba senji crore 5 nungi crore 7.5 tsünga lir, ta metetdakja liasü.

Iba ken o temai adokba sülen Uttar Pradesh state sorkari tentetba Special Investigation Team (SIT)-i bushisüngdangba ajanga, taküm April 27 nungi June 5 tsünga tenla auyaba tatalokba 70 ben liasü ta bushitetogo.

Iba mapang nungjagi tenzüka police-i Ram tekülem kidang inyaker nisung 8 ket nungi sen lakh 79.85 puogo.

Küm 2 tsünga sorkar school tem nung kaketshir lakh 86 ajemogo

New Delhi, July 08

(Agencies): Tesüiba küm ana tsünga (2023-24 aser 2025-26) India nung sorkar school tem nung kaketshir lakh 86 dak tali ajema kümogo, aser kasa mapang nung private school tem nung kaketshir lakh 88 dak tali kümogo.

2023-24, 2024-25 aser 2025-26 indang UDISE+ NEP-structure reports ya Mongolbarnü sangdonga liasü. 2025-26 küm school tem nung secondary level enrolment crore 24.7 liasü aser 2023-24 küm crore 24.8 liasü. Kasa mapang nung sorkar school tem nung enrolment crore 12.8 aliba nungi crore 11.9 aküm.

Private unaided recognised school tem nungbo enrolment crore 9 aliba nungi crore 9.9 aküm, ta report nung shia lir.

Iba mapang nungji sorkar school tem tera ajema aküm, ajiüsüa tesayurtembo lakh 98

aliba nungi crore 1 aküm.

Ano school tanur kata maliba school 12,954 aliba nungi 5,663 dang kümogo aser tesayur ka dang aliba school tem lakh 1.1 aliba nungi lakh 1 dang aküm.

Secondary level nung teburtem dang nungi tetsürtemi jenjang tajungba angur. 2025-26 küm tetsürtem GER teimba (74 vs 69.6) liasü.

Kasa mapang nung school tem nung infrastructure terenlok kanga liasü, talisa digital jenjang kanga junga kümogo. Computer facility aliba school tem shilem 57.2 aliba nungi shilem 69.9 kümogo aser internet facilities aliba school tem shilem 53.9 aliba nungi 67.4 kümogo.

Tangbo school tem shilem 99.5 nung tzü tajemtsü junga agütsür, metsü meshidak junga aliba school shilem 99.1 lir, tetsürtem atema metsü meshidak temeja agütsüba


school shilem 98.5 lir aser electricity aliba school tem shilem 95 lir.

School shilem 40.1 nung ang CWSN-friendly toilets lir, tzünglu tzü rizüngba facility aliba school shilem 29.9 lir aser solar panels aliba school shilem 11.5 dang lir.

State tem sasep nung tesüiba küm ana tsünga kaketshirtem enrolment teimtiba aliba state ji Uttar Pradesh lir. Iba sülen Telangana aser Jharkhand na lir.

Ano school tem nung enrolment kanga ajema akümba state temji Rajasthan, Bihar aser Tamil Nadu state tem lir.

Secondary Gross Enrolment Ratio (GER) teimtibaji Jharkhand aser Haryana na liasü aser GER kanga ajema akümba state temji Bihar, Meghalaya aser West Bengal lir.



July 08, 2026 nü Patna nung Patna Medical College & Hospital (PMCH) nung junior doctor temi healthcare workers nem security agüjang, ta takhangba agüja longkak aitba noksa nung angur.



TIR YIMYIM YIMOBILEM (EDITRIAL)

DIMAPUR THURSDAY, JULY (CHITENI) 09, 2026

Asenok aluyim balaka asütsüla

Asenok ya aluyimer kin süaka lia lia asenoki ayimba lu nungi züsentetba agi asenok tebok masüng akümba agi aluyimba mapa toktsür tanga mapatem inyaka taküm alitsü tenzük. Atangji, asen tsürabur mapang aluyimba mapaji tekong lu nung tsük lu ayimba dak alaka tanga aonsutsü aser süngjanglijang lu ayimba nungbo temulung magütsüi aru. Ano, asenok tsük lu ayimba sobaliba toktsübaji aluyimba nungi tebok sünga melitetba kuli kija dangbo masü saka alu mayimyonga ita sen chia kibong mesütsüsa government mapa adok aser senotsü aatsüsa tanga mapatema angu. Aji oda, asenok alu mayimyonga asenok chiyonger anüngtsüsa tzümar lu nungi züsenteter, anungji asenok belemseta tekong lu ayimba dang nungibo tanga mapatem inyaka senotsü aaba tajungba ta angatetba agi, tangbo asenok ya aluyimer kin agi ita sen chia government mapa inyaker kin ka dang mesüka kümogo. Atangji, aluyimba mapa ya Naga nunger ajaki toktsü ta masü saka Naga kintem rongnung tzülu ayimer Tenymia kintemibo tzülu ayimba mapa ya metoktsüi tanü tashi maneni yimdagi. Ibayongji, parnokbo pei lu nung züsentetba chiyongtsü achir saka asenokbo mersü nungi shir chi tashi tzümar lu nung züsentetba achir. Ashiko, iba jagi asenok dang nungibo parnokang anema taliba alir südi. Atangji, tanüa asenok asoshibo tsük lubo mayimang tajungba, kechiyong asenokbo tzülu ayimtsüsa tzü angudak ali lenden tesadem mali aser akhidang ama tekong lu nung tsük lu ayimba agibo asenok tebok masüngtsü. Ajisüaka, tsüklusa meyimaka tanübo asenoka tanga aonsutsü aser süngjanglijang lubosa ayimtsüsa akümer, kechiyong tzümar lu nung züsentetba chiyongtsü ya aika züsentettsü asoshi mozü amshia ayimba chiyongtsü asüba agi temang atema chiyongtsü masü saka tashidak achir amaiang ka kümogo. Aji oda, tzümartem dang nungi aliba chiyongtsütem jang nungi shir aonsutsü alo, bengana, gopi aser mersü aser ano süngjanglijangtem ajak ya mozü amshia ayimba chiyongtsütem asünungji, item chiyongtsütem jagi tebokbo asünger saka temang mejungi raksatsür. Atangji, asenokbo alu nung belema meinyak ser office nung inyaka sen agi tzümar lu nung züsentetba chiyongtsütemji langlana alia chiyonger ta bilema chiyonger. Ajisüaka, aonsutsü aser süngjanglijang tarak maket topur tajung ser tang ongzükli aser yatazükli amai asenoki alia achibatemi chiyongtsü masü mim mozü achir ta bilemdi. Akhi mapang asenok tsüraburtem dak temetetba aser tangatetba ka alibaji, aonsutsü aser süngjanglijang koba nungsa shiruru aser mesen agi achiba agi tarak keta liden, item chiyongtsütemjiang nisung asoshia tachitsü chiyongtsü tajungtem liasü. Aji oda, tanüa asenoki arem nung reprangdangra shiruru aser meseni machiba süngolio aser süngjanglijangtembo tarak maket süsüa angutsü aser itemji nisungia machir. Ajisüaka, asenok dak iba ama tangatetba aser temetetba maliba agi, asenokibo aonsutsü aser süngjanglijang ayokdak tarak maket tesüsü topur ajung apia alir. Atangji, meilongibo asenokia tanübo tangatetba kati arur asünungji, joko asenok karibo tayoktsüsa mezüsentetaka, pei achitsü asoshibo pei lu aser atsü nung peria züsentet tenzükogo. Aji oda, tsük lua asenok peribo asenoki mozü mamshii yimtetra ajisa tajungba, ajisüaka tsük lu meyimetyonga asenoki asenok peritsüsa mersü aser tanga aonsutsü lu aser somomo ama tanga süngjanglijang lu yimtetra, iba jagi sen dang masü asen taküman kümzüktsü. Asenok kari senotsü ajangzüktsü atema tzümartem den toktepa mozü amshia aonsutsü aser süngjanglijang lu ayimer aser itemji aiben aika tayokdak mengutet shitokdaksür, kechiyong ayoktsüsa alu ayimba maparen nungbo asenoki tzümar den metokteptettsü. Ajisüaka, tzümartem den toktepa yimtettsüba lutemji kasa aonsutsü aser süngjanglijang lu süaka balaka ayimtsüla. Aji oda, mapabo kasa dang saka mozü mamshi ser ayimba inyakyim balaka nung alu ayimba agi asenoki tzümar aluyimertem denji tokteptettsü. Idangjibo, asenoki mozü mamshi züsentetbatemjiang tangari jenjang tulu agi raktepa alitsü.

OLEMSABANG

Aor tangari tetla-tetshiba kin ka kuma aor asü ?

~ L. Kika Pongener

Aor-ji Naga nunger rongnung mezüng tenük lapoka nuji aküm. Aor-i Naga nunger kin teimba ka tenük lapoka nuji kumdaktsü. Ajisuaka, tanübo aseni sayua aniteter kintem nem Aor tetla-tetshidaktsütsüsa kuma aor asü (?) Tanübo tangar kintem dang numa-medangtettsüsa tetla-tetshiba kin ka kuma aor asü (?) ta khen-khenbo kanga nemjema bilemer. Naga nunger tangar kintemi asen Aor dang nungi kechisarena ajak nung tajung yimlar. Anungji asenoki tangari asenok dak nungi imlaba amaji; mapa tajung inyaka sayutsüla. Ao lima nungi mezüng Revival milak jangrua tenzük. Ao lima nung mezüng 'Yi Bottle' bendener jaksa-a rongtok; aser Mokokchung District nung mezüng 'Try District' yimyim ayimoktsü. Ajisuaka, lia lia tajungba litet asü ? Mesura tamajungba litet ? Tanübo Ao lima kinuk-kisang ajak nung yi taluposa ayoker. Yi ajemer Aotsür Aor-sa teimba. Election nung sen yong Vote ayokba; raratepa züktepba; nisung tepsetba; Polling Station Coup asüba; nisung teshimtet ishikati yimer ajunga Vote ajenba....Iba ama mapa tamajungtem ajunga ya Ao lima nungi tamasa tenzük. Tanü Aor yimden aser loktiliba ajunga nung tangar kini tatishitsü tajung agitsüsa ochishia mapa tajung inyaker asü (?) Tanü Aor mungdang aser lim arogotem nung tangar kini lesson tajung agitsüsa ketdangsuba mapa nung ochishia ketdangsua inyaker asü (?) Tanü Aor kibongtem nung tangar kintemi tatishitsü tajung ajizüktsüsa mapa tajung inyaker asü (?) Mesura tangar kintemi tetla-tetshitsüsa tansutsü mapa aser maaksutsü mapa inyaker??? Khen meyipa reprangshidi.

Tanü putu ya kinuk-kisang ka nung kechi ataloker, item ajakji minute-second tsüngda nung Social Media sabang ajanga alima ajunga sunga-adoker. Küm ishika suiogo; Aor kibong kar nung kidang yariteper kilir (Domestic Helper) ayuba dak yimya dak tali kanga mejungi züka merenshiba otsü /osang ka....Social Media sabang nung prokshiba agi; asen Aor ajunga alima nubur matsüngdang tejak koda mesayu kanga maaksuogo. Mapang shia asen Aor kibongtem nung iba ama tansutsü aser maaksutsü mapa ataloker. Ano anogo ishika tejaklen Dimapur Jila nung asen Aor kibong ka nung atalokba otsü /osang ka Social media nung prokshiba yagi; Aor ajak alima matsüngdang maaksu tulu nguogo. Osang-tsüsang prokshibaji shitak asütsü akok; mesura tesulenbo temedena angutsü akok; saka ochi obendang mangu tsüngda Aor ajunga maaksuogo. Kidang kilir ayubaji mashi nisung ka kidangpo mayur; terabosa tangar dang nungi tangateter aser temeteter kibong nung dang ayur. Anungji kidang teyartiteper ayubaji asen jala-jabaso amai kanga meima anepalua ayutsüla. Aji oda, aseni sayua anitetba kintemi asen Aor dang nungi kechisarena ajak nung tajung yimlar....Anungji asenoki iba amaji mapa tajung inyaksüla.

Aji oda, asen kidang ki mapa nung yaritepa aser School züngdakja nisung tajung kumdaktsütsü teimla tulu nung kilirji yutsür. Anungji shir kidangsa kidang yariteper kilir yudir; pei jala-jabaso amai kanga meima anepalua sayuteta nisung tajung kumdaktsütsüla ta angatetdi. Hau...niii nisung ajak küsa masüji, kilir karibo tekalen meshitak mapa inyaka ashi-auya asütsü akok; libaliru nung awashi memeteti tim masüba yimya benshitsü akok. Ajisuaka, iba ama mashi-malo, metokmeperi aser tashimait aliyongjiang asen kidang kilia alir ta angatettsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

West Bengal tesem balala nung Khristantem anema inyak



July 05, 2026 nü West Bengal nung South 24 Parganas district kübok Subhashgram nung Hindu yimsü alia amanger telok kati 'Jai Shri Ram' ta ayimdena Tenla ki raksatsüdang tangokba noksa nung angur.

July 08, 2026: July 05, 2026 nü South 24 Parganas district kübok Subhashgram nung Hindu yimsü alia amanger telok kati 'Jai Shri Ram' ta ayimdena Tenla ki kichiba, sabang, kongki balala aser Tenla ki kolak nung Kangki raksatsü.

July 5 anogo nungjisa West Bengal tesem balala nung Khristantem amak.

Purba Bardhaman kübok Faridpur nunga anepdang 10:00 ako meta Grace Church nung tekülem sentong tagidak mapang nung amak.

Osangbenertem den jembidang iba Arogo nungji pastor Surajit Ghosh-i, "Mangatetep adokdaksü atema onok anema tiyazü nung tai tongloksür. Ibaji ajanga lokti nung yimjung raksatsütsü aser yimsü balala amangertem tsüingda tesünep raksatsütsü," ta ashi.

Paisa, Arogoi lapokba school nung azünger tsüraburtem kanga tsübur; ketdangsertemi iba ya mazüoktetra Khristantemi ano maneni timtem ajurutsüa akok, ta ashi.

Surajit Ghosh-isa, "Ozü Arogo nung züngsemtem, staff tem, kaketshirtem aser kibongtem atema onoki tebilemtsü katsür," ta metetdaksü.

Tenük kuli alirtemi, "Tanü telok kati Faridpur area nung Grace Church amak. Lokti jagi Tenla ki bensatsü aser pastor den züngsemtem dak azük," ta metetdaksü.

Khristantem amokmerenba osangji Bangiya Christiya Pariseba (Bengal Christian Council)-i police nem metetdaksüba sülen Katwa Police officer, Jyotirmoy Roy leniba nung police-i pastor aser Arogo nung züngsemtemji kümzüka anir ao.

BCP otongdar kati, "Jyotirmoy Roy leniba nung police-i pastor den züngsemtem kümzü. Pastor den Arogo nung lenir karbo kümzüka ayutsü atema police station-i anir ao," ta ashi.

Bankura nunga Pastor Rajib Das leniba nung Khristantem tekülem sentong agiba mapang nung Hindu yimsü alia amanger telok ka arua Laishiba ajak

rakzü. aser mapang tatsüka Khristantemji pua ayuba sülen chiok. Sonarpur künok Suvas Gram nunga telok kati Mizo Synod Arogo Tenla ki kichiba raksatsüba den külemi temeshi sabang raksatsü.

May 5, 2026 nü telok kati Murshidabad nung Khristan amitsür, Barnali Chatterjee ki raksatsü aser la dang Hindu nung tekülem ki asütsü atema lar kimongji tenla agüjang ta rongshia liasü. Iba sülen lai Berhampore Police Station nung ken o benok.

June 16 nüa West Bengal nung telok kati Pastor Biswajit dak azük.

June 21 nüa VHP aser Bajrang Dal züngsemtemi Raniganj, Paschim Bardhaman nung Khristantem tekülem sentong tagidak mapang nung timtem agütsü. Iba tesem nungji police liasü saka parnoki tensaji azioktsü atema kecha meinyak.

Tesülen Khristan 25 pua police nem agütsü.

Tang tashi West Bengal nungbo anti-conversion ozüing benoka liasü.

West Bengal nung Khristan teloktemi item ama tatalokba ajakji police nem metetdaksüba den külemi sorkar ketdangsertem danga Khristantem amakba nokdangtsü atema inyakdaksüner ta mepishiogo.

Bangiya Christiya Pariseba teloki July 3 nungi tenzüka hopta ana piyong campaign agitsü aser district magistrates nem temepishiba shidi agütsütsü.

Bengal Christian Council (BCP) ya East aser North-East India nung denominations balalai akümba tongti telok ka lir.

BCP legal team-i ken o benokba nung yaritepdar.

Item tatalokba ajak ya Bharatiya Nyaya Sanhita (BNS) nung Arrla 330 kübok aibelen lir. Iba Arrla nung, "Ozüing alema inyaksü tebilemba nung temelaba magii ki, Tenla ki mesüra kiojen telungi aibaji aibelen ka lir."

Arogo nung lenirtem aser meimchir temeden atema inyakba telok aikati state tesem balala nung Khristantem amakba osangji metetdakja

sorkar dang tekülem kitem kümzüksü, yimsü temeden wazüka ayutsü aser aibelenertem ajak aputsü mepishi.

July 5 tashi nung Khristantem amakertemji shinga mapu.

Kolkata nung Khristan lenir kati, tesüiba mapang nungbo state nung Khristantemi timtem ajangshia maru, ajisüaka state nung BJP sorkar aruba sülen Khristantemi timtem ajangshia arudar, ta metetdaksü.

Election mapang nung Suwendu Adhikari-i (tang Chief Minister), election nung Muslim nung voters-i opposition yariogo anungji pai Hindu nung atema inyaksü, ta jembia liasü aser ibaji ajanga Hindu yimsü alia amanger teloktem tasü itshidaksüsogo, ta pai ashi.

ANOGO ABEN TSÜNGREM DEN

Khristan Tekülem Mathi 4:1-11

Yihuda nung yimsü nung lenir tulu kati Yihuda nung aser khristantem kasa tekülem nung tajangzü. anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemtsür". Ibai bushitettsü tatempangba lemangji tekülembaji lir kechiaser tekülembaji taküm aliba leman ka lir. Tsüngrem tesangwa nung alimaji anguba leman ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzü. kba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba tebilemtsü aneptsü asoshi nai kechi merangdang? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Kü tanela nok nungi kümzü. kang, kü taküm azü tashi nungi kümzü. kang. Molusongzü bang nungi kümzü. kang; arem nashi pungchi nungi Nai kümzü. kang. Aser tesüneptsüba Tsüngremi nenok tetsüng kübok Satan ajemshitsü.

Egypt nung küm 1,600 tejaklen Khristantem aliba yimti ka ngutetogo



July 08, 2026: Egypt kübok Western Desert nung tebushitetba ka ajanga akhidang Khristan yimsü prokba aser Nile anasa aliba yimtitem nung dang masü saka tanga tesem balala nunga Khristan yimsü prokba kuli ngutetogo.

Archaeologist temi Dakhla Oasis nung Byzantine putu mapang nung aliba yimti ka ngutetogo, aser ibaji ajanga küm 1,600 tejaklen iba tesem nungji Khristantem aliba kuli angur.

Supreme Council of Antiquities-i Egypt kübok New Valley Governorate nung aliba tesem 'Ain Al-Sabil' nung alia tua bushisüngdangba mission ka tenzüka liasü, aser tang bushitetba ya Western Desert nung Byzantine mapang Khristantem aliba tongti kuli lir.

Iba tesem tiyongsü nungji Aso pezübuba AD nung 'basilica' mesüka yangluba Tenla ki ka lir, aser ibaji ajanga iba yimti nungji Khristan Arogo ka aliba kuli jangjar.

Archaeologist temisa ki tejen ka ngutet aser ibaji Tenla ki masü. dang Khristantemi Tenla ki ama amshia aliba südi ta amanger.

Iba dak alia ki tejen ka ngutet aser ibaji Tisus ta ser Arogo nung deacon ka meyong ki aliba südi ta bilemer.

Dakhla Antiquities Director General aser ali tua bushisüngdang tongti, Mahmoud Massoud-i, "Iba tesem nung ngutetba ajakji ajanga Khristantem aliba kuli jangjar. Iba tesem nungjisa lenmang, lenmang aika

ajurutepdak, lokti aliba moapu, kiojen aser meta penzütsü atema mitsa aika lir," ta metetdaksü.

Iba dak alia archaeologist temi ali chipo tejaksa 200 shi ngutet aser ali chipo tejaksa nungji Coptic Khristantem aser Greek nung ozülu lir.

Islamic, Coptic & Jewish Antiquities Sector nung tekolak, Daa Zahran-i, "Senotsü amshia shishilembaba, anogo shia libaliroba aser yimti nung nisung aika aliba kuli ngougo," ta ashi.

Research agirtemisa, tang item tebushitetba ajanga Egypt nung Byzantine mapang Khristantem aliba jangjar. Iba mapang nungji region tesem ajaklen Khristan yimsü proka liasü, ta metetdaksü.

World Cup: Argentina aser Switzerland quarterfinals-i iogo



Chiteni/July 8, 2026

(Agencies): Mongolbarnü Argentina aser Egypt na Atlanta Stadium nung round of 16 asaya nung Lionel Messi-i goal ka idaktsüba den Cristian Romero nem ball ka assist sütsüba sülen Argentina-i goal 2 agi asaya mekoki aliba nungi meyipa tur goal 3-2 agi takok nguogo.

Yasser Ibrahim aser Mostafa Ziko nati goal kaka idakja Egypt team tejakdang toktsüba den Messi-i penalty ka metsütepba sülen Argentina puri asaya makoktsü ta bilema liasü.

Ajisüaka Cristian Romero-i goal ka idaktsüba sülen Argentina-i asaya tembangtsü minute 11 anunga lia ano goal ana idakja asaya akok.

Messi-i tanabuba goal idakja iba World Cup nung goal tekububa idaktsü aser iba sülen mapang apuloktsür asayaba mapang Enzo Fernandez-i goal ka tongokja liasü.

Asaya tembangba sülen parnok nem foul kar magütsüba atema Egypt nunger asayar aser staff tem kanga mepelatep aser coaching staff ka nembo red card agüja liasü.

Argentina pur Honibarnü quarterfinal nung Switzerland den asayatsü.

Tanga asaya ka nung Switzerland-i penalty metsütepba sülen Colombia goal 4-3 agi koka quarter final tongtetogo.

Asaya nung team kati danga goal magütsüteti asaya

tembangba sülen penalty metsüteptsüsa aküm.

Penalty metsütepba mapang team anaprongla nungi asayari goal midaktsütet aser iba sülen Cucho Hernandez-i metsüba ball Switzerland goalkeeper Gregor Kobel-i kümzüik aser Ruben Vargas-i tatembangbuba penalty idakja Switzerland-i asaya akok.

Asaya nung team anapronglai goal idaktsütsü atema maongka nguteta asaya saka magütsüteti asaya tembang. Switzerland pur World Cup nung 1954 küm sülen tang mezüngbuba quarter-finals-i iogo. Iba küm parnoki iba asayamung ayongzüka asaya liasü.

Zimbabwe den asayamung atema Samson meshim



Chiteni/July 8, 2026

(Agencies): Zimbabwe den T20I asem asayatsü aliba atema shimba squad nung Sanju Samson densema mali. Pa England den tang asaya aliba asayamung nunga playing XI nung mali.

Shreyas Iyer lenisüba nung India team iba asayamung nung asayatsü, koba iba ita tatemlen asayatsü lir.

Samson meshimba atema tashishitepba aika adoktsü, kechiyong India team-i 2026 T20 World Cup akokba nung Player of the Tournament (POTM) anguba sülen pa asaya asem nung dang junga masayatet. Samson-i WC nung West Indies den quarter asayaba mapang out mesüi run 97 yanglu, semi nung England den run 89 yanglu aser New Zealand den final nung run 89 yanglua liasü.

Squad nung back-up wicketkeeper ama Prabhsimran Singh-i Samson melenogo. Punjab Kings (PBKS) batter ya küm asem lir tang mezüngbuba national team nung züngoksemogo. Pa ya 2023 Asian Games akokba India team nung densema liasü, saka tang tashi national team nungi khendanga masayai aruogo. Rinku Singh-a iba asayamung atema squad nung züngoksemogo.

Samson dak alia Vaibhav Sooryavanshi squad nung züngoksemogo. Samson maliba mapang arishi küm 15 tain asaya ya asaya ajak nung asayatsü imlar.

Kasa mapang nung bowling unit nung temelenshi aika adokogo. Ashok Sharma, Yash Thakur, aser Harsh Dubey nunger tang mezüngbuba T20 asayamung ka atema shimogo aser Mayank Yadav-a yiruba ajanga küm ana masayai lir tang squad nung densemogo.

Axar Patel, Washington Sundar, Ravi Bishnoi, Harshit Rana, Prasidh Krishna, aser Arshdeep Singh nunger ajak anisüngzükdaktsüogo.

Zimbabwe den asayamung atema India squad: Shreyas Iyer (Captain), Vaibhav

Sooryavanshi, Abhishek Sharma, Tilak Varma (Vice-Captain), Ishan Kishan (WK), Shivam Dube, Suryansh Shedge, Rinku Singh, Harsh Dubey, Varun Chakaravarathy, Prince Yadav, Yash Thakur, Ashok Sharma, Mayank Yadav, Prabhsimran Singh (WK).

Trump-i Greenland meshir, Spain den...

August ita tiyong tashinung teti asoshi yimjung tezüngzüktep yanglutsü nükjidong nung Iran den khen asoshi tezüngzütep yanglua aliba ya tembanger asü ta asüngdang dang, "Tasüngdangba kanga tajung. Ni atemabo, ibai tembangogo. Ni parnok den jembishinü mesüner. Parnok ya tamagitsü. Parnok ya nüngdak makaba nisungtem. Parnok ya nüngdak makaba nisungtemi anir," ta Trump-i langzü.

"Ni atemabo, parnok den jembishinüba ya mapang indokba dang lir," ta pai ashi.

US-i asendenshir Iran amakba bhukuma Rutte-i, "Yasüng nai kechi inyakogo, aji kanga nüngdaka aliba ka lir. Iba ya tashi tait telangzüba ka liasü," ta Trump dang ashi.

"Nai ceasefire alidang Iran-i ceasefire nung aibelener,

TESÜSABA ASAYA OSANG				
Argentina	3	2	Egypt	
ROUND OF 16				
July 08	1:30 AM	Switzerland	VS	Colombia
QUARTER-FINALS				
July 10	1:30 AM	France	VS	Morocco
July 11	12:30 AM	Spain	VS	Belgium
July 12	2:30 AM	Norway	VS	England
July 12	6:30 AM	Argentina	VS	Switzerland

Sourav Ganguly ICC Hall of Fame nung züngoktsü



Chiteni/July 8, 2026

(Agencies): Taoba mapang India cricket team captain Sourav Ganguly July 11 nü International Cricket Council's Hall of Fame nung züngoksemtsi.

Ganguly ya ICC's Hall of Fame nung züngoksemer aliba India nunger asayartem rongnung ka akümtsü. India nunger rongnung ICC Hall of Fame nung MS Dhoni, Virender Sehwag, Vinoo Mankad, Sachin Tendulkar, Rahul Dravid, Anil Kumble, Kapil Dev, Sunil Gavaskar, Bishen Singh Bedi aser taoba mapang India tetsür team captain Diana Edulji nunger densema lir.

Ganguly ya ajaki meimba India team captain ka liasü, shibai BCCI tir mapa-a inyakogo aser tang Cricket Association of Bengal tir lir.

Pa asaya aliba mapang pai Test asaya 113 nung run 7212 yanglu aser ODI 311 nung run 11363 yanglua liasü. Paisa

century 22 yanglu aser wicket-a 132 agia liasü.

Ganguly ya ODI asaya nung run timtiba yangluba asayartem rongnung ka lir. ODI asaya nung nüngtugu asayar Sachin Tendulkar den pai küm aika kanga junga asayaogo.

Pai off-side field nung kanga junga asayaba ajanga pa dang "God of off-side" ta ja liasü, aser pa ya India nunger batter tem rongnung asayar tajungtiba ka aser captain ka ta züngshir.

2000 küm pai India team captain mapa agizükba mapang team ya jenjang mejungi liasü. Ajisüaka Ganguly lenisüba nung pai Tendulkar, Virender Sehwag, VVS Laxman, Anil Kumble aser Harbhajan Singh nunger amala asayartem anidena bendanglen oa Test asayamung tem nung takok angu tenzüka liasü.

Ganguly lenisüba nung India team ya 2002 küm ICC Champions Trophy joint winner liasü aser 2003 küm South Africa nung ODI World Cup final tonga liasü. Pai anir India team England nung oa test asaya ka draw asü, 2004 küm Pakistan nung Test asayamung ka akok aser Kolkata nung Australia team test 16 tashi khendanga tamakok mongui asaya aliba tembangdakja liasü.

(Tapak 7 nungi...)

anungji US-i tashiyim amshitsüji tongtipang ama bilemer."

Trump-i European linüktem defence tsütsü senotsü tali indokdaktsüba asoshia pai tenüsang agütsü.

Rara mapang European linüktemi US sepai nem par airspace aser bases tem mamshidaktsü ta Trump-i aija aru.

Trump-isa Greenland ya par linüki yimsü asütsü takhangba agütsü, koba Denmark indang semi-autonomous territory ka lir, anungji iba ken o ajanga Europe nung tembar linük den tesendaktep mejungi kumer aliba kaktetshi.

"Greenland ya United States

asoshi kanga tongtipang lir, saka Denmark asoshi tongtipang masü," ta pai ashi.

"Atangji nung Denmark ya anogo ka majungdang Nazis-i amokbang - Hitler-i anogo ka nung parnok akok aser agi - parnoki onok dang Greenland anepalutsü ashio. Atangji onoki Greenland agi, aser tamashi mapa inyaka onoki meyipa agütsü."

Denmark Ato Kilonser Mette Frederiksen-i Greenland ya agitsüba/agütsütsü indang masü ta nenshia ashi. "Ozü litsülika densema NATO indang alinük ajunga kumzüka ayutsü onok renema lir," ta lai ashi.

BILEMDANGANG

"Temulung sunepa alitsü atema tangar tebilemba nem na tanishidaktsü."

Trump-i Greenland meshir, Spain den shishilempa masütsü



Ankara, Chiteni/July 08 (Agencies): Bodhbarnü US Tir Donald Trump-i Spain den shishilempaba tesendaktep rakdangtsü shia asendenshir Greenland agitsü o jembiba ajanga NATO nung külem züngsem Denmark jashidakja NATO lenirtem temulung mesüngjemdaksür.

Turkey yimtiba Ankara nung jembidang, Trump-i Madrid ya NATO nung partner tamajung ka lir ta ashi, kechiaser pai Iran den raraba nung pa meyarir anema iba o ya jembi aser Treasury Secretary Scott Bessent dang Spain den shishilempaba ajunga anentsü totuyuba agütsü.

Trump-i ano Iran den ceasefire tashi mait ka yanglua aliba tembangogo ta sangdongba ajanga iba NATO mungdang nung linük balala nungi adenshia aliba lenirtem tebilemtsü akar, kong European

lenirtemi lungjemer Ukraine yaritsü teimla liasü.
Trump ya NATO Secretary Mark Rutte den külemi liasü, shibai defence tsütsü senotsü indokba nung temulung masüba, Iran aser Greenland dak sendakba nung kanga kumdanga mesüzüktsü meranga liasü aser iba ama ken o benokba asoshi tir nem tenüngsang agütsü.
Parnoki iba senden metenzükdang kanga kumdanga European NATO linük temi military nung senotsü indokba tali kumdakja Mongulbarnü sen \$50 billion indang defence sentong saya liasü.
Washington aser Madrid ya mapang tatsüka mangatettep nung arur, kechiaser Trump-i European linüktem dang mitkar nung senotsü indokba tali akumtsü aser pei indang defence asoshi senotsü agütsütsü akhangba Spain-i khenyongi magizüker.
Madrid nung Socialist lenirtemi ano Iran rara nung US nem par indang airspace mesüra par litsü nung aliba bases amshidaktsütsü memulung.
"Spain ya amajok nung yaritepba linük ka dang lir. Onoki joko Spain den shishilempa mesüner. Anungji ni aji rakdangner. NATO nung

Spain ya partner tamajung ka lir. Parnoki shilem magir, parnoki magütsür. Ni Spain den kecha meinyakner. Semdangba densema Spain den shishilempa ajunga rakdangang," ta Trump-i ashi.
Spain Ato Kilonser Pedro Sanchez indang office-ibo Trump-i jembiba ya yimya ka ama agizüker aser linük ana tesendaktep ajanga linük anaprong ajangzüker ta ashi.
Ajisüaka Health Minister Monica Garcia-i, "Onok ya sovereign, democratic linük ka lir aser multilateralism aser yimjung asoshi inyaker. Tesendaktep melen mesüshiba agi mangmangdaksüba ya majung," ta X nung ashi.
NATO diplomat ka dang Trump-i jembiba nung naia kechi ashir ta asüngdang dang, "POTUS-i benokba onük ajak nung telangzüba tejangja lir: European NATO ka yangertsü. Aser onoki Ankara nung aji inyaker," ta langzü.
US mitkari ano Iran dak amak aser tankers asem dak amakba langzüa Iran totzü ayoktsü melaa license agüja aliba agientsü. Iba ya tashi mait yimjung tezüngzüktep ka yanglua aliba nung tebilemtsü ajuruba tesüsaba alitsü, koba Europe nung nüburtemi magizüker.
(Maneni tapak 8 nung...)

Defence industry nung tenokdangba agütsür aliba agintsü Erdogan-i ayongzük



Ankara, Chiteni/July 8 (Agencies): Turkey Tir Tayyip Erdogan-i Bodhbarnü, NATO allies temi parnok yongtsü nung defence-industry dak sendakba nung tenokdangba agütsür aliba agintsüla, ta shiogo.
"Defence tesendaktep aser talisa defence industry nung allies tem yongtsü nung tenokdangba agütsür aliba ya agintsüla," ta Erdogan-i Ankara nung NATO lenirtem summit lapokba mapang ashi.
"Common sense aser reason dak amendaker tesendaktep yanglutsü lenmang sadema lapoka aliba mapang European Union nung dena maliba allies tem züngtokba ajanga Europe nung artificial telemdang adokdaksütsü," ta pai ashi.
Mongolbarnü US tir Donald Trump-i, pai Turkey nem tenokdangba agütsür aliba agintsü aser Ankara dang F-35s ayoktsü atema telemtetba ka agitsü, ta ashi. Ajisüaka

telemtetba anaprongla ya Congress-i anemtsü akok.
Turkey ya NATO züngsemtem rongnung army tulutiba aliba linük tanabuba lir aser parnok ya prangbong injang yanglua export asürtem rongnung tulutiba kümogo.
Ankara-i, SAFE funding scheme amala European security inyakyim nung dener ta shia arudar, ajisüaka yimden yimsüsüba aser policy balala asüba ajanga parnok medendaksüi arudar.
Erdogan-i ashiba agi, NATO indang 5% defence spending target atongtsü atema Turkey lenmang shitak nung odar aser NATO indang air aser ?missile defences akangshitsü atema "Steel Dome" air defence project asoshi USD billion 24 talila lemozütsüo.
Paisa, allies temi alliance telungjem meraksadaksüi bloc defence dak sendakba nung khuret tali abentsüla ta ashi.

Russia-i hopta ka nung Kyiv asemben makogo

Kyiv, Chiteni/July 8 (Agencies): Russia-i ano manger mesangwa tsüngda Kyiv dak ballistic missile tem khaloktsüo, ta ketdangsürtemi Bodhbarnü metetdaksü. U.S.-made air-defence interceptor tem agi anüngba maongka agia Russia-i hopta ka majung tsüngda Ukraine yimtiba ya tang agi tasembenbuba makogo.
Ankara nung NATO summit agia aliba mapang tang Kyiv ya makdar. Iba summit nung US tir Donald Trump aser Ukraine tir Volodymyr Zelenskiy na sensak asemtsü lir.

air defences-i khadangba air force data ajanga sayuogo.
Air raid siren ola magütsü tsüngda Kyiv kübok tesem balala nung bomb apokba ola angashia liasü, ta Reuters atema tenük kuli agütsürtemi ashi.
Kyiv amakba mapang tetsür ka tepset aser nisung ana yiruogo, ta ketdangsürtemi metetdaksü.
Kyiv Mayor Vitali Klitschko-i ashiba agi, Russia-i anüng ajanga amakba sülen storage tesem ka aser nisung maliba ki ka nung mi adoka liasü.
Reuters footage ajanga warehouse ana nung mi adokba aser mibenertemi mi abentsü merangba sayuogo.
Kasa mapang nung Ukraine nung yimti tulutiba rongnung tanabuba Kharkiv-a missile agi makogo, ta local ketdangsürtemi ashi. Iba tesem nung nisung aliba ki ana aser tekülemdak ka raksa liasü. Ano Bodhbarnü nisung aliba ki ka amakba sülen nisung ana süogo, ta Mayor Ihor Terekhov-i ashi.
Trump shibai summit mamen tsüngda Zelenskiy aser Putin naprongla den sensaksemogo, pai Mongolbarnü Ankara nung ashiba agi, rara ya takaratiba nung tembangdaksütsü imlar.



NAGALAND INSTITUTE OF MEDICAL SCIENCES & RESEARCH (NIMSR)
(An Autonomous Society under the Government of Nagaland)
Reg.No:HOME/SRC-7549 dated 01-03-2022
KOHIMA- 797001

Email: nimsrkohima@gmail.com
Website: nimsr.nagaland.gov.in

Dated Kohima the July 2026.

NO. NIMSR-4/1/Human Resource/2023

CORRIGENDUM

With reference to this office Advertisement No.1/2026 vide No. NIMSR-6/31/HR/Advt/2024/106/dated 15th June 2026, the following corrigendum/rectification is made under the Education Qualification against item No.1 for filling up the post of Psychiatric Social worker.

Item	Minimum Educational qualification
Item No. 1	- Master's Degree in Social Work (MSW/MA Social Work) with M. Phil in Psychiatric Social Work from a recognised University/Institution - or Master in Psychiatric Social Work (M.PSW) recognised by the National Commission for Allied and Healthcare Professions (NCAHP).

The Advertisement No.1of 2026, file No. NIMSR-6/31/HR/Advt/2024/106/dated 15th June, 2026, may be read as NIMSR-4/1/Human Resource /2023/106/ dated 15th June 2026.

Sd/-
(DIR. PROF. DR. SOUMYA CHAKRABORTY)
Director cum Dean,
Nagaland Institute of Medical Sciences & Research
Kohima, Nagaland.

GOVERNMENT OF NAGALAND

DIRECTORATE OF YOUTH RESOURCES AND SPORTS

NAGALAND::KOHIMA

NO.DYRS-SPORTS-KI/1/2025/

Dated, Kohima the July 2026

ADVERTISEMENT

The Department of Youth Resources & Sports invites application for the post of Past Champion Athlete under Khelo India Centre. The post is purely on hiring basis under Khelo India Scheme and terminable as and when the scheme culminates.

Detail of Post

Sl	Name of the District	Discipline	Number of Post	Remuneration per month
1	2	3	4	5
1.	Zunheboto Hq.	Badminton	1 (one)	25,000/-
2.	Aghunato, Zunheboto	Table Tennis	1 (one)	
3.	Kiphire Hq.	Football	1 (one)	

* Post and Centre are subject to change from time to time.
Eligibility criteria for the aforementioned post will adhere to the latest Implementation Guidelines for Khelo India Centres (KICs). Pleaserefer to the guidelines available at Khelo India Guidelines.
Interested candidates are invited to submit a biodata, along with the application and requisite documents, including achievement certificates, on or before 31st July 2026via email to kicnagaland@gmail.com or submit at Directorate of Youth Resources and Sports, Nagaland, Kohima (Sports Section) during office hours. Shortlisted candidates will be called for Interview.

Sd/-
DIRECTOR